

Ho Tloha Boikhohomosong ho ea Boikokobetsong



SABATHA MANTSIBOEA

Bakeng sa Boithuto ba Beke Ena Bala:

Dan. 4:1–33, Liprov. 14:31,2 Marena 20:2–5, Jonase 3:10, Dan. 4:34–37, Ba-Fil. 2:1–11.

Teman'a Khopolo:

“Lipontšo tsa oona li ka kang! Le mehlolo ea oona e matla hakakang! Borena ba oona ke borena bo sa feleng, ho nka lelokong le leng ho isa melokong e sa feleng”(Daniele 4:3).

Boikhohomoso bo bitsoa sebe sa ‘nete sa pele. Se qalile ho hlahella ka Lusifera, lenyeloi mapatlelong a leholimo. Ke ka hoo Molimo o reng ho Ezekiele, “Pelo ea hau e ne e ikhohomositse ka botle ba hao, o ne o bolisitse bohlahle ba hao ka bala ka bokhabane ba hao; ke o lihetsa fatše ke hona, ke u beile pela marena ho hobosoa” (Ezek. 28:17).

Boikhohomoso bo bakile ho oa ha Lusifera, kahoo o sebelisa boikhohomoso ba hae ho isa ba bangata tseleng e isang timelong. Bohle re batho ba oeleng, bao bophelo ba bona bo itšetlehileng ho Molimo. Lineo li fe le li fe tseo re nang le tsona, tsohle tseo re li fihlang ka lineo tseo, li tsoa feela ho Molimo. Kahoo, re sebete ha ka kang hore re ka ikhohomosa, ra ikakasa ha, bonneteng, boikokobetso bo lokela ho rena ho tsohle tseo re li etsang?

Ho nkile nako e telele hore Nebukadnesare a ithute bohlokoa ba boikokobetso. Le ponahalo ea monna oa bone kahar’a sebopi sa mollo o bohale (sheba beke e felileng) ha ho ea fetola tsela ea hae ea bophelo. Ebile feela kamorao ho hore Molimo a mo amohe ‘muso oa hae ‘me a mo romele ho ea phela le libatana tsa naha morena a utloisisitseng boemo ba hae.

**Ihute thuto ea beke ena ho lokisetsa Sabatha sa la 1 Hlakola.*

Na ha se Oona Babilona o Moholo?

Bala Daniele 4:1–33. Morena o etsahallosa keng ‘me hobaneng?

Molimo o fa Nebukadnesare toro ea bobeli. Khetlong lena morena ha a lebale toro. Empa kahobane ba bohlae ba Babilona ba hloleha hape, morena o laela hore Daniele a bitsoe a tlo fana ka manollo ea toro. Torong, morena o bona sefate se seholo se fihlang leholimong ‘me molebeli ea halalelang a hooa a re sefate se rengoe. Ho siuoe kutu feela le metso ntse li le mobung ‘me se kolobisoe ke phoka ea leholimo. Se tlamehang se tsoentse Nebukadnesare ke karolo ea toro moo molebeli ea halalelang a reng, “Pelo ea hae e se hlole e e-ba ea motho, a fuoe pelo ea phoofolo, ‘me ngoaha e fete holim’a hae hasupa.” (Dan. 4:16). Ha a eelloa titeo ea toro, Daniele ka boikokobetso a bolela kamoo a lakatsang e ke toro e ka be e bua ka lira tsa morena. Leha ho le joalo, ho tšepahalleng molaetsa o torong, Daniele o re hantle toro e bua ka morena ka sebele sa hae. Hangata ka Bibeleng lifate li sebelisoa ho tsoantša marena, lichaba, le mebuso (Ezekiele 17; 31; Hosea 14; Sak. 11:1, 2; Luka 23:31). Ka hoo, sefate se seholo ke papiso e nepahetseng bakeng sa morena ea boikakaso. Molimo o nea Nebukadnesare borena le matla; empa leha ho le joalo o tsitlallela ho hloleha ho ananela hore tsohle tseo a nang le tsona li tsoa ho Molimo.

Tsepama holim’a Daniele 4:30. Morena o re’ng a bontšang hore o nts’a sa utloisise seo Molimo a mo fileng sona?

Mohlomong se kotsi-kotsi ka boikhohomoso ke hore bo ka re etsa hore re lebale hore na re itšetlehile ha kae ho Molimo ka tsohle. Hang ha re lebala re hatile hosele semoeng.

U fihletse lintho li fe bophelong ba hau? U ka ithaba ka tsona u be le boikhohomoso? Ha ho le joalo, ke joang?

Ho Hlokomelisoa ke Moprofeta

Bala Daniele 4:27. Kathoko ho tlhokomeliso ka se tlang ho etsahala, Daniele o eletsa morena ho etsa eng, ‘me hobaneng? (Sheba le LIProv. 14:31.)

Daniele ha a koaholle toro feela, o bile o bontša Nebukadesare tselā e ka mo lopollang boemong boo: “Ha ho le joalo, morena, keletso ea ka e amoheloe ke uena, u lopolle libe tsa hao ka ho etsa ka ho loka, le bokhopo ba hao ka ho hauhela bafumanehi, mohlomng ekaba u tla lelefatsa katleho ea hao ka hona” (Dan. 4:27).

Nebukadnesare o etsa mosebetsi o moholo oa ho aha Babilona. Lirapa, likanale, le makhohlōkholo a litempele le mehaho e meng e fetola motse e ‘ngoe ea limaka tsa lefatše la khale. Empa phatsimo le botle boo, karolo e ‘ngoe ea bona, e fihletsoe ka ho sotla makhoba le ho nena bafumanehi. Ho feta moo, leruo la ‘muso le sebelisoa ho khotsofatsa menyaka ea morena le matona a hae. Kahona, boikhohomoso ba Nebukadnesare ha bo mo sitise feela ho ananela Molimo, empa hape ho mo tlišetsa bofoku ba ho se bone mathata a bahloki. Ho latela tlhokomelo e khethelileng eo Molimo o e fang bafumanehi, ha ho makatse hore kathoko ho tse ling tsa libe tseo e ka bang Daniele o buile ka tsona kapele ho morena, o qolla sa ho nyahlatsa bafumanehi.

Molaetsa o eang ho Nebukadnesare ha se o mocha ho hang. Baporofeta ba Testamente ea Khale ba atisa ho eletsā batho ba Molimo khahlanong le ho hatella bafumanehi. Efele, har’a libe tse isang morena kholehong se hlahelletseng kaholimo ke ho nena bahloki. Haholo hobane, ho rekolohela bafumanehi ke pontšo e holimo-limo ea learato la Bokreste; khahlanong le seo, khatello le ho nyahlatsa bafumanehi ho bolela ho hlasela Molimo ka sebele sa Hae. Ka ho hlokomela bahloki, re ananela hore tsohle ke tsa Molimo, e leng se bolelang hore ha re na letho re mpa re le bahlokomeli ba thepa ea Molimo.

Ka ho sebeletsa ba bang ka maruo a rona, re khahlisa Molimo ‘me re ananela Borena ba Hae. Taba ea hore maruo ke a Molimo ke eona e lokelang ho hlalosa boleng le tšebeliso ea oona. Ke hona moo Nebukadnesare a hlolehang teng, le rona re ba kotsing ea ho hloleha, ntle le hore re ananele borena ba Molimo likatlehong tsa rona ‘me re bontše kananelo ea rona ea taba ena ka ho thusa bahloki.

Mookameli ea Phameng oa Busa . . .

Ho sa natshe ho bolelloa hore a sokolohe a batle tšoarelo ea Molimo, boikhothomoso bo sa sisinyeheng ba Nebukadnesare bo baka hore taelo ea leholimo e kenngoe tšebetsong (Dan. 4:28–33). Eitse ha morena a ntse a tsamaea tlung ea borena a ithorisa ka seo a se fihletseng, a otloa ka bothata ba kekello bo ileng ba mo bakela ho lelekoa tlung ea borena. Ekaba hore o ile a ba le mofuta oa lefu la hlooho le bitsoang clinical lycanthropy kapa zoanthropy. Bokulo bo joalo bo etsa hore mokuli a itšoare joalo ka phoofolo. Mehlang ea joale bokulo boo bo bitsoa “species dysphoria,” boikutlo ba hore ‘mele oa motho ke oa mofuta osele ‘me, kahona, takatso ea ho ba phoofolo.

Bala 2 Marena 20:2–5; Jonase 3:10; le Jeremia 18:7, 8. Litimana tsee li re bolella eng ka monyetla oo morena a n’ a na le oona ho qoba kotlo?

Ka bomalimabe, Nebukadnesare o tla lokela ho utloa ka letlalo. Ha a fuoe matla a borena, Nebukadnesare ha a na nako ea ho nahana ka kamano ea hae le Molimo. Kahona, ka ho amoha morena matla a borena a romeloa ho ea phela le libatana tsa naha, Molimo o fa morena monyetla oa ho ananela hore o itšetlehile ho Eena ka botlalo. Hantle-ntle, thuto ea mapomelo eo Molimo a batlang ho e ruta morena enoa ea ikakasang ke hore “Leholimo lea busa” (Dan. 4:26). ‘Nete ke hore kahlo ena ea morena e na le morero o moholo ka ho fetisa morerong oa Molimo, joalo kaha ho boletsoe ka ho hlaka taelong ea balebeli ba halalelang: “‘Hore ba utloang ba tsebe hoba Mookameli ea phahameng o na le ‘muso holim’ a borena ba motho, le hobane o bo fa eo a ratang ho mo fa bona, le hoba a ka phahamisa ho bona ea fetisang ka bonyenyane’” (Dan. 4:17).

Ka mantsoe a mang, khalemo e fuoeng Nebukadnesare e lokela ho ba thuto le ho rona. Hobane re oela sehlopheng sa “ba utloang,” re lokela ho ba hlokolosi ka thuto ea mantlha eo re lokelang ho ithuta eona hore “Mookameli ea phahameng o na le ‘muso holim’ a borena ba batho.”

Ke hobaneng ha tsebo ea hore Mookameli ea phahameng oa busa e le thuto e bohlokoa haholo hore re ithute eona? Tsebo ee, e lokela ho ama tsela eo re tšoarang, mohlala, bao re nang le matla holim’ a bona joang?

Ho Lelaletsa Mahlo Leholimong

Bala Daniele 4:34–37. Lintho li fetoha bakeng sa morena joang, ‘me hobaneng?

Molimo o lesa Nebukadnesare o otloa ke bokulo bo sa tloaelehang, empa khabareng o mo busetsa kelellong e phetseng hantle. Se thahasellisang ke hore tsohle lia fetoha ha qetellong ea lilemo tse supileng tse porofetiloeng ke moprofeta, morena eo ea kulang a lelaletsa mahlo a hae leholimong (Dan. 4:34).

“Nebukadnesare e bile semaka ho bafo ba hae bohle ka lilemo tse supileng: a kokobetsoa kapele ho lefatše lohle ka lilemo tse supileng. Eaba kelello ea hae e busetsoa ho eena, ‘me ka ho talima ho Molimo oa leholimo ka boikokobetso, a hlakomela letsoho le halalelang kotlong ea hae. Phatlalatsong eo a e etsang sechabeng a amohela molato oa hae le mohau o moholo oa Molimo puseletsong ea hae.”—Ellen G. White, *Prophets and Kings*, leq. 520. Ha ho potang hore ho ka ba le lipheto ho tse kholo ha re ka lelaletsa mahlo a rona leholimong. Eitse hoba kutloisiso e khutlele ho eena, morena a fana ka bopaki ba hore o utloile thuto ena. Empa pale ena ha se ea Nebukadnesare ho feta hore ke ea mohau oa Molimo. Morena o fetiloe ke menyetla e meraro ea ho amohela Molimo oa Israele e le Morena oa bophelo ba hae. Menyetla e joalo e ba teng ho eena ha a eelloa bohlale bo ikhethang ba baholehoa ba bane ba Judea (Daniel 1), ha Daniele a koaholla toro ea hae (Daniel 2), le ha banna ba bararo ba Ba-Heberu ba lopolloa seboping sa mollo o bohale (Daniel 3). Hape, haeba topollo eo e sa mo kokobetse, ke eng e tla mo kokobetsa? Ho sa natse manganga a ‘musi enoa, Molimo o mo nea monyetla oa bone, ‘me a qetella a hapile pelo ea morena, eaba o mo busetsa setulong sa hae sa borena (Daniel 4). Joalo kaha pale ea Nebukadnesare e bontša, Molimo o fana ka monyetla o mong kamor’a o mong e le hore a tle a re busetse kamanong e lokileng le Eena. Joalo kaha Paulose a ngola mengoaha-khoho kamor’a moo, Morena o “Joalo kaha Paulose a ngolile lilengoana ka morao ho sena, Jehova o “rata ha bohle ba ka bolokeha ‘me ba fihlele tsebo ea ‘nete” (1 Tim. 2:4 – ha se eona temana). Paleng ena re bona mohlala o motle oa ‘nete eo.

Molimo o u kokobelitse ka litsela li fe? U ile oa ithuta eng boiphihlelong boo? O ne o hloka ho etsa lipheto ho li fe ho qoba ho rutoa thuto eo hape?

Boikokobetso le Teboho

Morena ea sokolohileng oa bolela: “Baahi bohle ba lefatše ba joalo ka lefeela pel’a hae” (Dan. 4:35). Ho latela moelelo oa taba, o fetisa ntlha e fe ea bohlokoa?

Re tseba joang hore Nebukadnesare o feela a amohela Molimo oa ‘nete e le kannete? Re fumana bokapi ba mantlha tabeng ea hore Nebukadnesare ka sebele sa hae ke eena sengoli sa Daniele 4. Ehlile, boholo ba khaolo ena bo bonahala e le lengolo leo morena a le romelang hohle ho pharalla le ‘muso oa hae. Lengolong lena, morena o bua ka boikhohomoso ba hae le bohlanga, ‘me ka boikokobetso o ananela bokena-lipakeng ba Molimo bophelong ba hae. Marena a khale ke ka thata a n’ a ka ngola letho ka bona le ba theolang seriti. Hantle-ntle litokomane tsa khale tseo re li tsebang ke tse rorisang morena. Kahona, tokomane e kang ena, eo ho eona morena a amohelang boikhohomoso ba hae le boitšoaro ba hae ba bophoofolo, e supa tšokoloho ea ‘nete. Ho tlatselisa moo, ka ho ngola lengolo a bolela boiphihlelo ba hae ‘me a bolela borena ba Molimo ka boikokobetso, morena o etsa ketso ea ho ba moevangeli. O se a sitoa ho khutsa ka seo a se fihletseng le ho ithuta sona ho Molimo oa ‘nete. Seo re se boneng mona, hee, thapelong le thorisong ea morena (Dan. 4:34–37), se senola bonnete ba boiphihlelo ba Hae.

Joale morena o se a na le mehopolo e fapaneng ‘me o se a hlakomela meeli ea matla a hae a botho. Thapelong e tebileng ea teboho, morena o phahamisa matla a Molimo oa Daniele ‘me o amohela hore, “Baahi bohle ba lefatše ba joalo ka lefeela pel’a hae” (Dan. 4:35). Ke hore, batho ha ba na letho leo e leng la bona leo ba ka ikhabang ka lona. Kahona, lehlasele lena la ho qetela ka Nebukadnesare bukeng ea Daniele le bontša morena ea ikokobelitseng ‘me ea tletseng ka teboho, ea binang lithoriso tsa Molimo, hape a re eletsa khahlanong le boikhohomoso.

E, Molimo o ntse a tsoela pele ho fetola maphelo le kajeno. Ho sa natse hore na batho ba ikhohomosa le ho ba baetsalibe ha kae, ho Molimo ho tletse mohau le matla a ho fetola moetsalibe ea tletseng ka bokhelohi ho ba bana ba Molimo oa leholimo.

Bala Ba-Filipi 2:1–11. Re fumana eng moo e lokelang ho felisa boikhohomoso maphelong a rona?

Ho Ithuta Haholoanyane:

“Morena ea neng a ikhohomosa joale o fetohile ngoana oa Molimo ea ikokobelitseng; ‘musi ea khopo ea neng a hatella, morena ea bohlale ea lereko. Eo ea neng a ile a rohaka le ho nyefola Molimo oa leholimo, eaba joale o ananela matla a Mookameli ea Phahameng ‘me a leka ho phahamisa tšabo ea Jehova le thabo ea bafo ba hae. Katlas’a khalemelo ea Eo e leng Morena oa marena le Khosi ea likhosi, qetellong Nebukadnesare o ne a ithutile thuto eo babusi bohle ba lokelang ho ithuta eona—hore boholo ba ‘nete bo etsoa ke ho ba molemo e le kannete. O ile a ananela Jehova e le Molimo o phelang, a re, ‘ ‘Na Nebukadnesare, kea rorisa, kea leboha, kea boka, , ke holisa Morena oa leholimo, hobane ketso tsa hae kaofela ke tsa ‘nete, tsela tsa hae ke ho loka, ‘me o na le matla a ho kokobeta ba tsamaeang ka tsela ea boikhohomoso.’ “Morero oa Molimo oa hore ‘muso o moholo ka ho fetisisa lefatšeng o phatlalatsa thoriso ea Hae joale o ne o phethahetse. Phatlalatsa ena e bulehileng sechabeng, eo ho eona Nebukadnesare a ananelang mohau le molemo le borena ba Molimo, e bile ketso ea ho qetela ea bophelo ba hae e ngotsoeng nalaneng e halalelang.”—Ellen G. White, *Prophets and Kings*, leq. 521.

Lipotso tsa Puisano:

1. “Boikhohomoso bo lebisa bokhopong bo bong le bo bong bosele: ke boemo ba kelello bo khahlanong le Molimo ka botlalo. Taba ee e bonahala e na le peepe ho uena? Haeba ho le joalo, e nahanisise. . . . [Boholo ba boikhohomoso bo e mong a nang le bona, bo lekana le boholo ba kamoo a hloeang boikhohomoso ho ba bang. Hantle-ntle, haeba u batla ho fumana hore na u ikhohomosa ha kae tsela e bonolo ke ho ipotsa, ‘Ke hloile ha kae ha batho ba bang ba sa ‘natse, kapa ba sa mpone ka letho, kapa ba nkhothotsa, kapa ba ntšosa, kapa ba ikhaba?’ Taba ke hore boikhohomoso ba motho e mong bo tlholisanong le boikhohomoso ba batho ba bang bohle. Ke hobane ke ne ke batla ho utluoe ka ‘na moketjaneng oa boithabiso ke kahona ke tenehileng hore motho e mong osele ke eena eo ho utluoang ka eena. Thamahane ha li robale ‘moho.’”—C. S. Lewis, *Mere Christianity* [New York: Touchstone, 1996], leq. 110. Lewis o re’ng moo eo mohlomong e ka re thusang ho bona boikhohomoso maphelong a rona?
2. ‘Mokotaba o bonoang khaolong ena, hammoho le tse tlang pele ho eona, ke borena ba Molimo. Hobaneng ha taba ee ho le bohlokoa hore re e utloisise? Sabatha e nka karolo e fe ho re thusa ho utloisisa ‘nete ee ea bohlokoa?’